



Grupo Provincial Socialista

Rúa Progreso, 32 – 2º andar
32003 Ourense
Tlf. 988 317 972
CIF: G32244345

ÁLVARO VILA ARAUJO, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA CONTRIBUIR AO MANTENIMENTO E MELLORA DO SERVIZO DE AXUDA NO FOGAR PRESTADO POLOS CONCELLOS OURENSÁNS**.

A Lei 39/2006, de 14 de decembro, de Promoción da Autonomía Persoal e Atención ás persoas en situación de dependencia (Lei de Dependencia), regula as condicións básicas para garantir uns mínimos na promoción da autonomía persoal e a atención ás persoas en situación de subordinación. Sancionase deste xeito a creación dun Sistema para a Autonomía e Atención á Dependencia (SAAD) coa participación e colaboración de todas as Administracións Públicas, e a garantía pola Administración Xeral do Estado dun contido mínimo común de dereitos para todos os cidadáns en calquera parte do territorio español, independentemente do seu lugar de residencia. Segundo o artigo 1.1 da devandita Lei, *“o Sistema para a Autonomía e Atención á Dependencia responderá a unha acción coordinada e cooperativa da Administración Xeral do Estado e as Comunidades Autónomas, que contemplará medidas en todas as áreas que afecta ás persoas en situación de dependencia, coa participación, chegado o caso, das Entidades Locais”*. Corresponde ás Comunidades Autónomas a planificación, ordenación, coordinación e dirección do SAAD, así como a xestión dentro do seu ámbito territorial dos servizos e recursos necesarios para unha axeitada atención da dependencia (artigo 11.1).

No marco da cooperación interadministrativa prevista no artigo 10 da Lei de Dependencia, os convenios subscritos entre a Administración Xeral do Estado e as Comunidades Autónomas determinan as obrigas asumidas por cada unha das partes no financiamento dos servizos e prestacións do Sistema e, neste senso, “a aportación da Comunidade Autónoma será, para cada ano, alomenos igual ca da Administración Xeral do Estado” (artigo 32). Polo tanto, en Galicia a prestación dos servizos que recolle a Lei 39/2006, de 14 de decembro, compete tanto a Estado como a Xunta e concellos, sendo o seu financiamento responsabilidade dos gobernos central e autonómico. Porén, promesas incumpridas da Xunta mediante, unha derivada da Lei de Dependencia, como é o Servizo de Axuda no Fogar (SAF), pilar fundamental sobre o que se artella o sistema de auxilio e protección dos colectivos máis vulnerables en Galicia, tense convertido nunha –cada vez máis– pesada carga económica para os municipios galegos. Coa suba do IPC e a necesaria mellora das condicións laborais das persoas traballadoras no servizo, entre outros elementos, tense producido un incremento máis que significativo do custo da prestación, sen que o goberno autonómico teña feito ningunha adecuación nas achegas para cumprir coa súa obriga de financiar o SAF e paliar os elevados custos que soportan os concellos.

Malia sucesivos anuncios, o goberno autonómico limitábase a sancionar as autorizacións do número de horas que cada concello pode prestar para posibilitar a entrada de usuarios no sistema. Así, cantas máis horas e persoas, maior é o custo do servizo, recaendo o desfase na contabilidade municipal, a pesares de que o pagamento debería recaer directamente na Consellería de Política Social e Igualdade. Namentres a Xunta mantén controlado o seu gasto, os concellos ven perigar a súa estabilidade orzamentaria, sendo estes quen licitan e adxudican un servizo que se encarece ano tras ano, nomeadamente nas entornas máis rurais e avellentadas, como as da nosa provincia, sendo ademais as que dispoñen de menos recursos. Para poder garantir un servizo de calidade para a veciñanza, cunhas condicións de traballo dignas, os concellos teñen asumido en solitario a suba do custo da SAF, sen achegas adicionais da Xunta. Os ingresos do Estado non cesan de aumentar, se ben o Fondo de Cooperación Local leva conxelado desde hai máis dunha década, redundando nun infrafinanciamento

socialistaourense@gmail.com

[Facebook: PSdeGdeOurense](#)

[Twitter: @PSdeGDepOU](#)



Grupo Provincial Socialista

Rúa Progreso, 32 – 2º andar
32003 Ourense
Tif. 988 317 972
CIF: G32244345

duns concellos que cada vez teñen máis competencias que *stricto sensu* non lle corresponden. Mentres que o goberno central destina fondos específicos ás comunidades autónomas para atender urxencias sociais no marco do Plan de Choque en Dependencia 2021-2023, a Xunta minora orzamento tras orzamento os fondos propios da partida destinada ao SAF.

O SAF preséntase coma un servizo capital en Ourense, que cada vez é máis demandado debido ás particulares condicións sociodemográficas da nosa provincia, debendo os municipios asumir importantes cargas, que non cesan de aumentar e hipotecan o seu futuro económico. Hai pequenos concellos do noso rural para os cales o servizo deveu extremadamente oneroso, superando mesmo ao gasto en limpeza viaria e recollida do lixo. Nalgúns municipios o SAF representa xa un de cada tres euros dispoñibles para gasto corrente, o cal se ve agravado coas novas disposicións que reducen o copagamento a asumir polos usuarios do servizo e que debe ser sufragado pola Administración. Os socialistas non podemos quedarnos de brazos cruzados mentres a Xunta, que ten as competencias, mira cara outro lado, resultando en último termo prexudicadas as persoas dependentes. No que a esta institución compete, aínda que moi por baixo do que os socialistas estiman óptimo, conseguimos que nesta lexislatura a Deputación incrementase os fondos destinados á atención social, que ascenden a 1,63 millóns, consagrando 1,4 millóns ao programa Benourense SAF Básico para, nomeadamente, a dixitalización do servizo. Á luz da inacción da Xunta e a difícil realidade dos concellos da provincia, atopándose en risco a sustentabilidade dos servizos públicos prestados, a Deputación de Ourense ten aportar moito máis para manter e mellorar un servizo esencial para o benestar social da provincia.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

PRIMEIRA.- Instar á Deputación de Ourense a demandar da Xunta de Galicia e a súa Consellería de Política Social e Igualdade a correcta asunción das súas competencias, que inclúen un financiamento acaído coa auténtica realidade do Servizo de Axuda no Fogar, incrementado as partidas dispoñibles a tal efecto e actualizando o Fondo de Cooperación Local.

SEGUNDA.- Poñer en marcha liñas de financiación do Servizo de Axuda no Fogar para minorar as achegas dos concellos de menos de 20.000 habitantes, garantir a súa estabilidade orzamentaria, desenvolver axeitadamente as prestacións e que poidan chegar a toda a veciñanza en situación de dependencia.

TERCEIRA.- Dotar de medios e recursos humanos e materiais aos equipos de valoración de dependencia para reducir as listas de agarda e requintar a prestación do servizo, así como exercer de mediador en eventuais negociacións entre concellos, empresas e axentes sociais para acadar os mellores acordos posibles en aras de garantir as mellores condicións para usuarios e demais partes implicadas no SAF.

En Ourense, a 13 de setembro de 2024.

Asinado: **Álvaro Vila Araujo**

SR. PRESIDENTE DA DEPUTACIÓN PROVINCIAL DE OURENSE

socialistaourense@gmail.com

[Facebook: PSdeGdeOurense](#)

[Twitter: @PSdeGDepOU](#)